



Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UPA2020-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Henrik Fleischer, Siumut)
(Siullermeerneqarnera)

Pingaarnertut Demokraatini isumaqarpugut oqartussaaffinnik tigusisassatsinnik tigusisassasugut, akissaqaleraangatta aamma ilinniarsimasunik sulisussaqaaleraangatta immikkoortunik isumannaatsumik ingerlatsisinnaasunik.

Uani siunnersuutigineqarpoq imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut Inatsisartunut nassuiaammik saqqummiussissasut.

Demokraatini isumaqataavugut tigusinermi kingunerusussat sukumiisumik misissorneqartariaqartut aamma tamanna tunngavigalugu misissuinerup aallartinneqarnissaa pillugu siunnersuut ilalerparput.

Oqaatsit taakkorpiat aamma atorpagut 2015-mi Ukiakkut Ataatsimiinnermi immikkoortoq 28 oqallisigineqarmat.

Manna siunnersuut 2015-mi saqqummiunneqartumut immikkoortumut assigisorujussuuvoq. 2015-mi immikkoortup akuerineqarnerata inerneraa nassuiaasiortoqarnera 2017-mi Inatsisartunut agguanneqartumik. Immikkoortumi pissutsit allanngornikuunngillat, taamaattumik Naalakkersuisut allannguutissatut siunnersuutaat tunngaviumik Demokraatini isumaqatigaarput.

Demokraatinili kissaatigineruarput oqartussaaffinnik assigiinngitsunik tigusinissamut atatillugu pingaarnersiuneq sorleq inuiaqatigiinnut akilersinnaanerussanersoq Naalakkersuisut misissussagaat.

Demokraatini kissaatigineruarput akisussaaffiit nunami maani aningaasarsiornitsinnik siuariartortitsisussat siullinneqassasut. Pingaarnersiunerup naggataani tungiuneq siunissami qularnaarneqarsimassaaq peqataanillu tigusinerup kinguneranik immikkoortunik allanik tigusinissatta akissaqartilernissaa tunaartarineqartariaqarpoq.

Demokraatini kissaatigaarput ataatsimiititaliap nalilersussagaa oqartussaaffinnik assigiinngitsunik tigusinissamut atatillugu pingaarnersiuisoqarnissaanut Naalakkersuisut peqquneqarnissaat pillugu allannguutissamik siunnersuuteqassanerlutik tassani tunngavigineqassalluni oqartussaaffiit sorliit siulliullugit tiguneqarpata Kalaallit Nunaanni suliffeqarnej aningaasarsiernerlu anginerusumik iluaquserneqassanersut.

Taamatut oqaaseqarluta siunnersuut ataatsimiititaliamut susassaartumut ingerlateqqipparput.